

Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat

Inigisassaqartitsineq, inigisaqarnermut ikiorsiissuteqarneq, inigisanik attartortitsineq il.il. pillugit Kalaallit Nunaannut inatsimmi nr. 944-mi, 23. decembari 1986-imeersumi § 1 naapertorlugu makku aalajangersarneqarput:

Kapitali 1

Aalajangersakkat nalinginnaasut

§ 1. Inatsisartut peqqussutaata matuma atuuffii tassaapput, Namminersornerullutik Oqartussat:

- 1) Kommunit inissiaataannik attartortittakkanik sanaartornermut kommuninut tapiissutaat, tak. kap. 2.
- 2) Kommunit illuutaannik ataatsimoorussanik sanaartornermut kommuninut tapiissutaat, tak. kap. 3.
- 3) Inissianik Namminersornerullutik Oqartussanit taarsigassarsititsivigineqarsimasunik pigisaqalernissamut, alliliinissamut pitsanngorsaannissamullu tapiissutaat imaluunniit taarsigassarsiarititaat, tak. kap. 4.
- 4) Illunik sanaqataaffiusunik pigisaqalernissamut tapiissutaat imaluunniit taarsigassarsiarititaat, kiisalu illunik sanaqataaffiusunik iluarsaassinissamut tapiissutaat, tak. kap. 5.

§ 2. Inatsisartut peqqussutaat manna naapertorlugu tapiiffigineqarnissamik taarsigassarsinissamilluunniit allakkatigut qinnuteqaat Naalakkersuisuni suliaassanngorlugit ingerlaavartumik nassiunneqartarsinnaavoq, taamaattoqli tak. § 56.

Imm. 2. Akiliutinik akiligassanngorsimasunik, akiitsunik akilinngitsuukkanik, akileeqqusissutitut akitsuutinik akiitsuullu sinnerinik isumakkeerfigineqarnissamik allanngortitsinissamilluunniit allakkatigut qinnuteqaatit Naalakkersuisuni suliaassanngorlugit ingerlaavartumik nassiunneqartarsinnaapput.

Imm. 3. Tapiissutisisup taarsigassarsisulluunniit qinnuteqaatip suliarineqarneranut atatillugu paasissutissat eqqunngitsut amigartulluunniit tunngavigalugit eqqunngitsumik Naalakkersuisunit pissarsiarisimasani, tapiissutisisup taarsigassarsisulluunniit utertillugit akilissavai.

§ 3. Inissiap imaluunniit sanaartukkap sananeqarneranut, pigineqalerneranut, allilerneqarneranut imaluunniit pitsanngorsarneqarneranut aningaasartuutit tamakkiisut, ilaatigut pilersaarusionermermut, sanaartorfissagissaanermermut akitsuummumut, sanasunut aningaasartuutissanut, sanaartornermut taarsigassarsiat erniaannut, najukkami sanaartorfissagissaanermermut, sanaartornermik aqutsinermermut, qularnaveeqqusiussaqarluni taarsigassarsinermi allagartap suliarineqarneranut nalunaarsorneqarneranullu, kiisalu naqissusiinermermut akitsuummumut aningaasartuutissanik ilaqartinneqartut qinnuteqartup naatsorsussavai.

§ 4. Inigisap annertussusaa imm. 2-5 naapertorlugit naatsorsorneqassaaq.

Imm. 2. Inini quleriiaani ataatsimi inigisap annertussusaanik naatsorsuinerimi, silataani qalliutaanit silarlermit uuttorlugu inigisap takissusaa silissusaanut amerlisillugu naatsorsorneqassaaq. Qisuit qalliutit marluuppata, silataani qisummit allermiit uuttuisoqassaaq. Illup iluani naatsiiviit inissiap annertussusaanut tamakkiisumut ilaanggillat.

Imm. 3. Illup qalia najugaqarfissatut suliarineqarsimappat, inigisatut atorineqartup annertussusaa ilanngunneqassaaq. Illup qaliani inigisap annertussusaata naatsorsornerani takissusaa silissusaanut amerlisillugu naatsorsorneqassaaq. Takissusaa inini quleriiaani ataatsitut nalinginnaasutut uuttorneqassaaq, silissusaalu illup silataani qaliap qaaniit qaliani 1,5 meterinik portussusillip tungaanut uuttorneqassalluni. Aniinganerit, soorlu qaliani aniingarnit, iikkat ininut killiliisut silataannut uuttorneqassapput.

Imm. 4. Naqqup ataani inigisap annertussusaa naqqup ataata silataani iikkamiit takissusaa silissusianut amerlisinneqarneratigut uuttorneqassaaq. Naqqup ataa tamakkerluni atorineqanngippat, iikkat ilorliit, ininut naatsorsuinerimi ilaatinneqartunut killiliisut qeqqiniit inigisap annertussusaa naatsorsorneqassaaq. Naqqup ataani init tamakkiisumik cementimik betonimilluunniit qallerlugit natiligaanngitsut naatsorsuinermit ilaatinneqassanngillat. Naqqup ataata quillu annertussusaasa sisamararterutaat imm. 2 malillugu inigisap annertussusaanik naatsorsuinermit ilanngunneqassapput.

Imm. 5. Inissiap iluani majuartarfiit naatsorsuinerimi quleriiaani tamani aqquteqarfigisaannut ilaatinneqassapput. Torsuusat, majuartarfiit majuartarfillu sangoriaat ataatsimoorussat, illumi ininut kiassakkanut qallersuutit iluiniittut naapertuuttumik, annerpaamilli 11 kvadratmeterinik, naatsorsuinerimi ilanngunneqassapput. Pequusiviit, quit salliarnartallu naatsorsuinermit ilanngunneqassanngillat, oqorsarneqarlutik inissiap najugaqarfittaasa annertussusaanut ilanngunneqarsinnaanngikkunik.

§ 5. Taamaallaat sanaartukkanut, piffissami sananeqarfimminni, allilerneqarfimminni pitsanngorsarneqarfimminnilu sanaartornermut pilersaarusiornermullu inatsisinut atuuttunut naammassinnittunut tapiisoqarsinnaavoq taarsigassarsititsisoqarsinnaallunilu.

§ 6. Taamaallaat inissianut sanaartukkanullu, neriorsuuteqartoqarnissaa sioqqullugu suliasanut pisussaaffiliisumik isumaqatigiissusiornermisunngitsunut imaluunniit sanaartorlugit aallartinneqarsimanngitsunut tapiisoqarsinnaavoq taarsigassarsititsisoqarsinnaallunilu.

§ 7. Inissianut sanaartukkanullu, inuussutissarsiutinik ingerlataqarfiusussanut imaluunniit inuussutissarsiutinik ingerlataqarfiusunut Inatsisartut peqqussutaat manna naapertorlugu tapiisoqarsinnaanngilaq imaluunniit taarsigassarsititsisoqarsinnaanani. Tamatumanili inuussutissarsiutit namminersortumik ingerlanneqartut minnerusut pineqanngillat.

§ 8. Inissiat sanaartukkalluunniit, Inatsisartut peqqussutaat manna naapertorlugu tapiiffigineqartut taarsigassarsititsivigineqartulluunniit sukkulluunniit minnerpaamik ikuallattoornissamut anorersuarneranilu ajoqusernissamut sillimaserneqarsimassapput.

§ 9. Peqqussut manna naapertorlugu tapiissuteqarnissamut imaluunniit taarsigassarsititsinissamut neriorsuutit Naalakkersuisut akuersiteqqaarnagit inummut allamut tunniunneqarsinnaanngillat.

§ 10. Inatsisartut peqqussutaat manna naapertorlugu qinnuteqaatit suliarineqarnissaannut Naalakkersuisut ukununga tunngasunik maleruagassiorsinnaapput:

- 1) Qinnuteqartarnermi periaatsit.
- 2) Paasissutissanut ilassutissanik pissarsiniarneq.
- 3) Qinnuteqarnissamut immersugassanik assigiissaakkanik suliaqarneq atuinerlu.

4) Pissutsit qinnuteqartumut tunngatillugu immikkut ittumik pingaartinneqartussat.

Imm. 2. Naalakkersuisut qinnuteqaatinik, tapiissutinik taarsigassarsianillu aqutsinnermut atatillugu sullissinissaq suliamullu piareersaataasunik isumaginninnissaq pillugu inummut allamut isumaqatigiissuteqarsinnaapput.

§ 11. Naalakkersuisut Inatsisartut peqqussutaat manna imaluunniit inissianik inissialiortiternermut tapersiissuteqartarneq pillugu Inatsisartut peqqussutaat siusinnerusukku atuuuttu naapertorlugit tapiiffigineqarsimasunik imaluunniit taarsigassarsititsivigineqarsimasunik tigusinnerminni, Naalakkersuisut inissianik teknikkikkut aningaasaqarnikkullu naliliisarnermut, kiisalu inissianik tunisinermut akiusunik aalajangersaasarnermut maleruagassiorsinnaapput.

§ 12. Naalakkersuisut Inatsisartut peqqussutaat manna malillugu tapiissutissanik taarsigassarsiarititassanilu tunniussisarnermut maleruagassiorsinnaapput. Tamatumunnga ilanngullugu tapiissutissat imaluunniit taarsigassarsiarititassat sanaartornerup nalaani naafferarlugit tunniunneqartassanersut Naalakkersuisut aalajangersinnaavaat.

Kapitali 2

Kommunit inissiaataannut attartortittakkanut tapiissutit

§ 13. Naalakkersuisut kommunit inissiaataannik attartortittakkanik sanaartornermut kommuninut imm. 2-mi nr. 1-imiit 3-mut aalajangersarneqartunut tapiissuteqarsinnaapput.

Imm. 2. Naalakkersuisut tapiissutit imatut tunniunneqassapput:

1) Inigisanut 60 kvadratmeterit tikillugit annertussuseqartunut tapiissutit kvadratmeterimut 9.700 koruuninik annertussuseqarput.

2) Inigisanut 60-imiit 85 kvadratmeterit akornanni annertussuseqartunut tapiissutit kvadratmeterimut 8.500 koruuninik annertussuseqarput.

3) Inigisanut 85-imiit 110 kvadratmeterit akornanni annertussuseqartunut tapiissutit kvadratmeterimut 8.000 koruuninik annertussuseqarput.

Imm. 3. Inigineqartussaq minnerpaamik 20 kvadratmeterinik angissuseqarpat aatsaat Naalakkersuisut inissianut tapiissuteqarsinnaapput. Inissiaq annertunerugaluarpalluunniit, inissiap inigineqartussaq annertussusaanut annerpaamik 110 kvadratmeterimut taamaallaat Naalakkersuisut tapiissuteqarsinnaapput.

§ 14. Namminersornerullutik Oqartussat tapiissutaat aatsaat tunniunneqarsinnaapput, init amerlassusissaannut aamma kvadratmeterinngorlugu angissusissamut piumasaqaatit uku naammassineqarsimappata, taamaattoorli tak. imm. 3:

1) Inissiaq ataatsimik imaluunniit ataatsimik affarmillu initalik minnerpaamik 20 kvadratmeterinik annerpaamillu 45 kvadratmeterinik annertussuseqassaaq.

2) Inissiaq marlunnik initalik minnerpaamik 45 kvadratmeterinik annerpaamillu 60 kvadratmeterinik annertussuseqassaaq.

3) Inissiaq pingasunik initalik minnerpaamik 60 kvadratmeterinik annerpaamillu 85 kvadratmeterinik annertussuseqassaaq.

4) Inissiaq sisamanik initalik minnerpaamik 85 kvadratmeterinik annerpaamillu 110 kvadratmeterinik annertussuseqassaaq.

5) Inissiaq sisamat sinnerlugit initalik minnerpaamik 95 kvadratmeterinik annertussuseqassaaq.

Imm. 2. Minnerpaamik ini ataaseq, igaffittut initulluunniit atorneqanngitsoq minnerpaamik 9

kvadratmeteriuppat aatsaat Naalakkersuisut tapiissuteqarsinnaapput.

Imm. 3. Naalakkersuisut init amerlassusissaannut kvadratmeterinngorlugulu angissusissaannut piumasaqaatinik *imm. 1*-imi aamma *2*-mi taaneqartunik uniuisinnaapput.

§ 15. Naalakkersuisut kommunit inissiaataannik attartortittakkanik sanaartornermut tunngatillugu maleruagassiorsinnaapput, tassunga ilaallutik akinut, suliasamat, pilersaarusiornermut, aqutsinermut naatsorsuutinullu piumasaqaatit.

§ 16. Kommunit inissiaataat attartortittakkat Naalakkersuisunit tapiiffigineqarsimasut, Naalakkersuisut akuersiteqqaarnagit siunertanut, najugaqarfissatut atorineqarnerminnit allaanerusunut atugassatut tuniniarneqarsinnaanngillat atorineqarsinnaanatilluunniit.

Imm. 2. *Imm. 1*-imi aalajangersakkamik unioqutitsinerup kingunerissavaa kommunip inissiaataanik attartortittakkanik tunisinermi iluanaarutissanit Namminersornerullutik Oqartussat pissarsiassai erngerlutik utertillugit akilerneqassammata. Taamaattoqanngippat kommunip Namminersornerullutik Oqartussanit pissarsiassaasa pissarsiassarilerumaagaasalu suulluunniit ilanngaatinissaat Naalakkersuisut pisinnaatitaaffigaat.

§ 17. Kommunalbestyrelsip kommunip inissiaataanik attartortittakkamik tunisinissaq kissaatigippagu, Naalakkersuisut akuersinissaannut piumasarineqarpoq:

1) Kommunip inissiaatai attartortittakkat najugaqarfigineqartut, attartortunut inissiani attartornermik isumaqatigiissuteqartunut neqeroorutigineqassasut.

2) Kommunip inissiaatai attartortittakkat inoqanngitsut tamanut ammasumik tuniniarneqassasut aammalu annerpaamik neqerooruteqartumut tunineqassasut.

Imm. 2. Kommunip inissiaataanik attartortittakkanik tunisinermi iluanaarutissanit Namminersornerullutik Oqartussat pissarsiassai Namminersornerullutik Oqartussanut utertinneqassapput, imaluunniit kommunimi inissianik nutaanik sanaartornermut sanaartorfissagissaanermulluunniit atorineqassallutik.

Kapitali 3

Kommunit illutaanut ataatsimoorussanut tapiissutit

§ 18. Naalakkersuisut kommunit illuutaanik ataatsimoorussanik sanaartornermut kommuninut tapiissuteqarsinnaapput.

Imm. 2. Illut ataatsimoorussat aalajangersimasut suut tapiiffigineqarsinnaanersut pillugu Naalakkersuisut maleruagassiorsinnaapput, tassunga ilaallutik ilusilersorneqarnissaaannut atorineqarnissaaannullu piumasaqaatit.

Imm. 3. Nunaqarfinnut isorliunerusunullu kiisalu illoqarfinnut, ineqarnikkut nunaqarfinni pissutsinit allaanerungaanningsunik atugaqarfiusunut tapiissuteqartoqarsinnaavoq.

§ 19. Kommunit illuutaat ataatsimoorussat tassaapput illut tamanut atugassiat, uffarfilerlugit errorsarfilerlugillu ilusilersorneqarsinnaasut aammalu ininik pikkorissarfinnik, katersortarfinnik, inissiisarfinnik, allaffinnik, sannavinnik minnerusunik il.il. atuiffiusinnaasut.

§ 20. Naalakkersuisut tapiissuteqarneranni illuliassat katiteriaannaat, nalinginnaasumik ilusilersukkat atortulersukkallu sumiiffimmi tunniunneqartut tamatigut pineqarput. Tamatuma saniatigut atortulersuutitut immikkut ittunut, sanaqataasumit ikiorserneqarnermut, ilitersuisunit ikiorserneqarnermut, illuliassat katiteriaannaat taakkuluunniit ilaasa inissititernerinut kiisalu innaallagissamat attaviliinerneq, imermut aqqusersuinerneq kiassaasersuinerneq illuunniit aningaasartuutitut matusissutissanik tapiisoqarsinnaavoq.

Imm. 2. Imm. 1-imi taaneqartut saniatigut kommunit illuutaanik ataatsimoorussanik misileraalluni sanaartornermut atatillugu Naalakkersuisut tapiissuteqarsinnaapput ikiorsiissuteqarsinnaallutilluunniit.
Imm. 3. Illunik ataatsimoorussanik siornatigut sananeqarsimasunik nalilersuinissamut aningaasartuutitut Naalakkersuisut tapiissuteqarsinnaapput.

§ 21. Kommunit illuutai ataatsimoorussat Naalakkersuisunit tapiiffigineqarsimasut, Naalakkersuisut akuersiteqqaarnagit siunertanut, kommunit illuutaattut ataatsimoorussatut atorineqarnerminit allaanerusunut atugassatut tuniniarneqarsinnaanngillat atorineqarsinnaanatilluunniit.

Imm. 2. Imm. 1-imi aalajangersakkamik unioqqutitsinerup kingunerissavaa kommunip illuutaannik ataatsimoorussanik tunisinermi iluanaarutissanit Namminersornerullutik Oqartussat pissarsiassai erngerlutik utertillugit akilernerqassammata. Taamaattoqanngippat kommunip Namminersornerullutik Oqartussanit pissarsiassaasa pissarsiassarilerumaagaasalu suulluunniit ilanngaatinissaat Naalakkersuisut pisinnaatitaaffigaat.

Imm. 3. Kommunalbestyrelsip allakkatigut isumaqatigiissuteqarluni kommunip illuutaata ataatsimoorussap ilaata tamarmiusulluunniit ingerlanneqarnera peqatigiiffinnut, inuinnarnut suliffeqarfinnulluunniit tunniussinnaavaa, tamatumani inatsisit allat unioqqutinneqanngippata.

Imm. 4. Imm. 2 naapertorlugu kommunalbestyrelsip isumaqatigiissutaa Naalakkersuisunit akuerineqassaaq.

§ 22. Kommunit illuutaannik ataatsimoorussanik atuilernissamut akuersisummik tunniussisoqarnissaata tungaanut Naalakkersuisut atortunut tunniunneqartunut tamanut piginnittussaataapput, tassungattaq ilaallutik kommunip nammineq suliniuteqarneratigut illuummulluunniit aningaasaliissuteqarneratigut nalillit pilersinneqartut.

Kapitali 4

Akiliutitut tapiissutitalimmik tapiissuteqartarneq imaluunniit taarsigassarsititsisarneq

§ 23. Kapitali manna malillugu tapiissutit taarsigassarsiarititalluunniit inunnut namminersorsinnaassuseqartunut aammalu Kalaallit Nunaanni najugaqartutut inuit allattorsimaffianni nalunaarsorsimasunut tunniunneqarsinnaapput.

§ 24. Naalakkersuisut inissianik Namminersornerullutik Oqartussanit taarsigassarsititsivigineqarsimasunik pigisaqalernerumut, alliliinerumut pitsanngorsaанermulluunniit akiliutitut tapiissutitalimmik taarsigassarsititsisinaapput.

§ 25. Inissianik sananermut, pigisaqalernerumut, alliliinerumut pitsanngorsaанermulluunniit Namminersornerullutik Oqartussanit taarsigassarsiat allanik taarserlugit akiliutitut tapiissutitalimmik Naalakkersuisut taarsigassarsititsisinaapput.

Imm. 2. Taarsigassarsiat allanik taarserlugit taarsigassarsiat amerlassusissaannik aalajangersaanermi akiitsut sinneri, akiliutissat akiligassanngortinneqartut akiitsullu akilinngitsuugaasimasinnaasut, siornatigut taarsigassarsiaasimasunut akileeqqusinerumut akitsuutininik ilaqartinneqartut ilanngunneqassapput, tak. imm. 1.

Imm. 3. Naalakkersuisut taarsigassarsiat allanik taarserlugit taarsigassarsititsinerminni, tamatumunnga peqatigitillugu taarsigassarsisut ataasiakkaat akilersuinissaannut Naalakkersuisut pilersaarusiortassapput, tassanilu akiliutissat aammalu taarsigassarsiat allanik taarserlugit taarsigassarsiat piffissaq akilersorneqarfissaat allasimasassapput.

§ 26. Naalakkersuisut inunnut, ukiuni akileraaruteqarfusuni kingullerni marlunni inoqutigiinni akileraaruteqaataasussanik 180.000 koruuninik amerlanerusunilluunniit isertitaqarsimasunut, imaluunniit inunnut, piffissaq manna tikillugu isertitai apeqqutaatinngit siunissami qaninnermi ukiumi akileraaruteqarfusussami inoqutigiinni akileraaruteqaataasussanik 180.000 koruuninik amerlanerusunilluunniit isertitaqartussat naatsorsuutigineqartunut taarsigassarsititsisinnaapput.

§ 27. Taarsigassarsinissamik qinnuteqaatit naliliiffigineqarnerini qinnuteqartup nalilinnik pigisaqarnera aammalu sulisinnaassusiatut naatsorsuutigineqartoq, kiisalu inissiap pisoqaassusaa niuernikkullu nalinga immikkut Naalakkersuisut isiginiassavaat. Taakku saniatigut makku Naalakkersuisunit isiginiarneqarsinnaapput:

- 1) Inissiap atortulersuusersugaanerata pitsaassusaa.
- 2) Inissiap qanoq issusia tamakkiisoq.
- 3) Najukkami inissianik pilersuineq.
- 4) Inissiap tunineqarsinnaaneranut periarfissat.

Imm. 2. Inissianik Namminersornerullutik Oqartussanit taarsigassarsititsivigineqarsimasunik alliliinissamut pitsanngorsaaniissamulluunniit qinnuteqaatinik, kiisalu taarsigassarsiat allanik taarserlugit taarsigassarsinissamut qinnuteqaatinik nalilersuinnermi aammattaaq Naalakkersuisut qinnuteqartup akiitsuisa sinneri kiisalu qinnuteqartup maannamut akiliisinnaassuseqarsimanera akiliinissamullu piumassuseqarsimanera isiginiassavaat.

Imm. 3. Qinnuteqartoq aatsaat siunissami akilersuinnissamut piginnaaneqartutut Naalakkersuisunit naliliiffigineqarpat, Naalakkersuisut taarsigassarsititsisinnaapput.

§ 28. Inissianik Namminersornerullutik Oqartussanit taarsigassarsititsivigineqarsimasunik pigisaqalernissamut taarsigassarsiat aamma taarsigassarsiat allanik taarserlugit taarsigassarsiat inissiap qularnaveeqqusiunneqarneratigut qularnaarneqassapput. Taarsigassarsiat inissiamik qularnaveeqqusiussaatitaanerme akilerneqartussatut siullertut tunniunneqassapput.

Imm. 2. Inissianik Namminersornerullutik Oqartussanit taarsigassarsititsivigineqarsimasunik alliliinissamut pitsanngorsaaniissamullu taarsigassarsiat inissiap qularnaveeqqusiunneqarneratigut qularnaarneqassapput. Taarsigassarsiat, inissiaq qularnaveeqqusiullugu inissianik Namminersornerullutik Oqartussanit taarsigassarsititsivigineqarsimasunik pigisaqalernissamut aningaasalersuutissatut taarsigassarsiarititat aamma taarsigassarsiat allanik taarserlugit taarsigassarsiarititat akilereernerini akilerneqartussatut inissisimassapput.

Taarsigassarsisup akiliutai, tapiissutit aamma meeqqanut tapiissutit

§ 29. Inissianik Namminersornerullutik Oqartussanit taarsigassarsititsivigineqarsimasunik pigisaqalernissamut taarsigassarsiarititat ukiumut 6 procentinik erniaqartinneqassapput. Qaammammut akiliutissat piffissaq akilersuiffusussaq sivisunerpaamik ukiunik 20-nik sivisussuseqartussanngorlugu naatsorsorneqassapput.

Imm. 2. Inissianik Namminersornerullutik Oqartussanit taarsigassarsititsivigineqarsimasunik alliliinissamut pitsanngorsaaniissamullu taarsigassarsiarititat ukiumut 6 procentinik erniaqartinneqassapput. Qaammammut akiliutissat piffissaq akilersuiffusussaq sivisunerpaamik ukiunik 15-inik sivisussuseqartussanngorlugu naatsorsorneqassapput.

Imm. 3. Taarsigassarsiat allanik taarserlugit taarsigassarsiat ukiumut 6 procentinik erniaqartinneqassapput. Qaammammut akiliutissat ukiumut kvadratmeterimut 420 koruuninik

annikinnerunngitsunik aningaasartaqartussanngorlugit aalajangersarneqassapput.

Imm. 4. Taarsigassarsisoq sukkulluunniit immikkut ittumik akiliuteqarsinnaavoq, tamannalu piffissap akilersuiffiusussap sivikillineranik sunniteqassaaq. Immikkut ittumik akilersuuteqarnermi Namminersornerullutik Oqartussanit tapiiffigineqarnissaq pisinnaatitaaffigineqarpoq.

§ 30. Akiliutissat 70 procentii taarsigassarsisumit akilerneqassapput, kiisalu akiliutissat 30 procentii Naalakkersuisunit tapiiffigineqassallutik, tak. § 29.

Imm. 2. Taarsigassarsisoq qaammammut akiliutissat akiligassanngortinneqarnerini 18-it inorlugit ukiulinnik angerlarsimaffimmi najugaqartunik, inuit allattorsimaffianni nalunaarsorsimasunik qitornaqarpat, taarsigassarsisup imm. 1 naapertorlugu akiliutai appartinneqassapput. Meeqqamut ataatsimut, amerlanerpaamilli meeqqanut arfinilinnut taarsigassarsisup § 29, imm. 1, 2 imaluunniit 3 naapertorlugu qaammammut akiliutai, akiliutit 7,5 procentiinik appartinneqassapput.

Imm. 3. Taarsigassarsisoq pisussaavoq meeraq akiliutinut appaanermut tunngavisoq angerlarsimaffimmi najugaqartutut inuit allattorsimaffianni nalunaarsorsimajunnaarpat tamanna Naalakkersuisunit nalunaarutigissallugu.

§ 31. Taarsigassarsisup piffissaq eqqorlugu qaammammut akiliutissani akilersimanngippagit, pissutissaqanngitsumik kinguaanertaqanngitsumik akiliutissat akilerneqarnissaannik allakkatigut Naalakkersuisut piumasaqaateqassapput. Akileeqqusinerni tamaginni akileeqqusisummut akitsuut 50 koruuniusoq, akiitsut 1.000 koruuninit amerlanerusut 2 procentiannik ilallugu akiitsunut akilinngitsuukkanut ilanngunneqartassaaq.

Atuinissamut killiliissutit aamma taarsigassarsiat akiligassanngortinneqartarnerat

§ 32. Taarsigassarsiat, taarsigassarsiat allanik taarserlugit taarsigassarsiat imaluunniit taarsigassarsiat allanngortitat akilerneqarnissaasa tungaanut inissiamut tunngatillugu atuinissamut killiliissutit makku atuutsinneqassapput:

1) Inissiaq eqqartuussisutigoortumik sulissutiginninnermut atorneqarsinnaangilaq.

2) Inissiaq qularnaveeqqutitut atorneqarsinnaanngilaq, taamaattorli tak. § 28.

§ 33. Taarsigassarsiat, taarsigassarsiat allanik taarserlugit taarsigassarsiat imaluunniit taarsigassarsiat allanngortitat akilerneqarnissaasa tungaanut taarsigassarsisoq pisinnaatitaavoq inissiaq Namminersornerullutik Oqartussanut, inissiamik tigusinissamik pisussaafeqartumut utertissallugu.

Imm. 2. Taarsigassarsisup inissiaq Namminersornerullutik Oqartussanut utertippagu, Namminersornerullutik Oqartussat taarsigassarsisullu akornanni aningaasatigut isumannaarneqartussat Naalakkersuisut naatsorsussavaat.

Imm. 3. Aningaasatigut isumannaarneqartussat naatsorsorneqassapput piffissami utertitsiffiusumi inissiap teknikkikkut aningaasaqarnikkullu nalingattut, akiliutit akiligassanngortitat akiitsullu sinneri kiisalu akiitsut akilinngitsuugaasimasinnaasut Namminersornerullutik Oqartussat pisassai ilanngaatalugit. Naatsorsukkat inernerini taarsigassarsisoq pisassaarpat taakku tunniunneqassapput.

§ 34. Taarsigassarsisup inissiaq taarsigassarsinermi atugassarititaasut allanngortinnagit piginnittuulertussamut allamut tunniussinavaa, tamatumani tunniussinissaq Naalakkersuisunit akuerineqarsimappat.

Imm. 2. Naalakkersuisut akuersinerannut piginnittuulersup inoqutaani isertitat, nalilinnik pigisaqarneq siunissamilu Naalakkersuisunit inissiamut taarsigassarsianut akilersuisinnaanera pillugu ataatsimut naliliineq tunngavigneqassaaq.

§ 35. Taarsigassarsiat, taarsigassarsiat allanik taarserlugit taarsigassarsiat imaluunniit taarsigassarsiat allanngortitat akiligassanngortinneqassapput:

- 1) Taarsigassarsianut ernialiussat akilersuutillu akilerneqanngippata, aammalu taarsigassarsisup pigisaq aalaakkaasoq qularnaaveeqqusiullugu taarsigassarsinermut uppersarsaat malillugu ernianik akilersuutinillu akiliisarnissamut maleruagassat malillugit piffissaq akiliiffiususaaq naatinngu akiitsuni akilinngitsuukkani akilersimanngippagit.
- 2) Taarsigassarsisup inissiaq illersorneqarsinnaasumik aserfallatsaalisimanngippagu, aammalu tamatumuunakkut Naalakkersuisut qularnaveeqqusiussaanni qularnaveeqqut ajorseriartooq paasineqarpat.
- 3) Taarsigassarsisup inissiaq ikuallattoornissamut anorersuarneranilu ajoqusernissamut sillimmasersimanngippagu.
- 4) Taarsigassarsisup inissiaq isaterpagu.
- 5) Inissiami ininik inuussutissarsiorfiusunik pilersitsisoqarpat, imaluunniit inissiamit inuussutissarsiuutinik ingerlatsisoqarpat. Tassanili inuussutissarsiuutit namminersortut mikinerusut pineqanngillat.
- 6) Taarsigassarsisoq Naalakkersuisut akuersiteqqaarnagit inissiaq qimallugu allamut nuuppat inissiamilluunniit attartortitsippat.
- 7) Taarsigassarsisoq inissiaq qularnaveeqqusiullugu taarsigassarsippat, taamaattoorli tak. § 28.
- 8) Taarsigassarsisup Naalakkersuisut inissiamik takusaaneranni isernissaannut itigartippagit.
- 9) Taarsigassarsisup Naalakkersuisut taarsigassarsititsivigisaannik alliliinissaq pitsanngorsaanissarlunniit naammassinngitsoorpagu.

§ 36. Taarsigassarsiat akiligassanngortinneqarnerini taarsigassarsisup taarsigassarsiat erngerluni akilinngippagit, Naalakkersuisut inissiaq tigussallugu aalajangersinnaapput.

Imm. 2. Naalakkersuisut inissiaq tigugunikku, Namminersornerullutik Oqartussat taarsigassarsisullu akornanni aningaasatigut isumannaarneqartussat Naalakkersuisut naatsorsussavaat.

Imm. 3. Aningaasatigut isumannaarneqartussat naatsorsorneqassapput piffissami utertitsiffiusumi inissiap teknikkikkut aningaasaqarnikkullu nalingatut, akiliutit akiligassanngortitat akiitsullu sinneri kiisalu akiitsut akilinngitsuugaasimasinnaasut Namminersornerullutik Oqartussat pisassai ilanngaatalugit.

Naatsorsukkat inernerini taarsigassarsisoq pisassaqqarpat taakku tunniunneqassapput.

§ 37. Taarsigassarsisup toqunerani taarsigassarsisup aapparisaq pinngitsooranilu kingornussisussai taarsigassarsisup taarsigassarsianut pisinnaatitaaffinik pisussaaffinillu tigusinissamik pisinnaatitaapput.

§ 38. Taarsigassarsisoq inissiamik Namminersornerullutik Oqartussanut utertitsisimappat, imaluunniit Naalakkersuisut inissiamik taarsigassarsisumit tigusisimappata, Naalakkersuisut imatut iliuuseqarlutik inissiaq tunisinnaavaat:

- 1) Taarsigassarsisunut nutaanut, taarsigassarsinermut atugassarititaasut allanngortinnagit inissiamik tigusisunut.
- 2) Taarsigassarsisunut nutaanut, inissiamik kiisalu atortussanik ilassutissatut pisariaqartunik illutut sanaqataaffiusutut taarsigassarsitinneqartunut, tak. § 48, imm. 2.
- 3) Taarsigassarsisunut nutaanut, inissiamik teknikkikkut aningaasaqarnikkullu nalinga tunngavigalugu tigusisunut.
- 4) Kommunimut akeqanngitsumik.
- 5) Peqatigiiffinnut, suliniaqatigiiffinnut inuinnarnulluunniit akeqanngitsumik.

Imm. 2. Taarsigassarsisup nutaap tigusinermut atatillugu aningaasartuutit tamaasa akilissavai. Imm. 1, nr.

1, 2 imaluunniit 3 naapertorlugu taarsigassarsisut nutaat tiguseranni, aningaasartuutit taarsigassarsianik tigusermut ilaatinneqarput.

Taarsigassarsianik allannngortitsineq aamma isumakkeerineq

§ 39. Taarsigassarsiallit, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasut, imaluunniit taarsigassarsiallit, piffissaq manna tikillugu isertitai apeqqutaatinnagit siunissami qaninnermi ukiumi akileraaruteqarfiusussami inoqutigiinni akileraaruteqaataasussanik 180.000 koruunit inorlugit isertitaqartussatut naatsorsuutigineqartut, akiliutissaat akiligassanngortinneqartut, akiitsui akilinngitsuukkat, akileeqqusinnermut akitsuutit akiligassaat akiitsuisalu sinneri Naalakkersuisut allannngortissinnaavaat. Taarsigassarsiallip akiliisinnaajunnaarnerani, akiliisarnermik unitsitsinerani, isumaqatigiissutit uniorlugit iliuuseqarnerani, akiliisinnaannginnini pissutigalugu unitsitsinerani, taarsigassarsisoq tammaaneqartoq toqusimasutut isigineqarneranik eqqartuussisutigit aalajangiinnermi, piginnittut nikinneranni kiisalu inissiaq isaterneqartussanngorpat taarsigassarsiat erniaqanngitsut akilersugassaanngitsullu akiligassanngortinneqassapput.

Imm. 2. Imm. 1 naapertorlugu isertitanut killiliussaq, meeqqanut ataasiakkaanut tamanut 18-it inorlugit ukiulinnut angerlarsimaffimmi najugaqartutut inuit allattorsimaffianni nalunaarsorsimasunut, amerlanerpaamilli meeqqanut arfinilinnut, meeqqamut ataatsimut 4.000 koruuninik qaffanneqartassaaq.

§ 40. Taarsigassarsiallit, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasut, aammalu taarsigassarsianut akiligassaarussimasut, taamaallaalli taarsigassarsianut akiitsunik akilinngitsuugaqarsimasut, akiitsui angeqqatigiimmik aningaasartalerlugit qaammatinut 60-inut Naalakkersuisut nalikilliaartuaartissavaat."

§ 41. Taarsigassarsiat § 39 naapertorlugu akiligassanngortinneqarsimappata, qinnuteqartoqarneratigit taarsigassarsiallip taarsigassarsiaasa ilaat, piginnittut nikinneranni isertitanit matussuserneqarsinnaanngitsut Naalakkersuisut isumakkeerinissutigissavaat.

Imm. 2. Qinnuteqaammik naliliiniarnermi pingaartumik qinnuteqartup pisuussutai inuussutissarsiorsinnaanermullu piginnaasassaattut naatsorsuutigineqartoq, tunisinermi pissutsit, tassunga ilanngullugu tunisinermi aki pitsaanerpaaq anguneqarsimanersaq, eqqarsaatigineqassapput.

Imm. 3. Naalakkersuisut imm. 2 naapertorlugu qinnuteqaatit sananeqartarnerannut, suliarineqartarnerannut naliliiffigineqartarnerannullu sukumiinerusunik maleruagassiorsinnaapput, tassunga ilaallutik isumakkeerinissamut isertitatigit pisuussutinillu pigisaqarnikkut piumasaqaatit suut naammassineqarsimassanersut, kiisalu tunisinissap naliliiffigineqarnerani pissutsit suut ilaatinneqassanersut.

§ 42. Taarsigassarsialinnut inissiamut siornatigit piginnittuuffigisimasaminnut akiitsoqartunut akiliutit akiligassanngortinneqartut, akiitsut akilinngitsuukkat, akileeqquneqarnermut akitsuutit akiitsullu sinneri Naalakkersuisut isumakkeerinissutigissinnaavaat.

Imm. 2. Imm. 1 naapertorlugu tamakkiisumik isumakkeerinissaq aatsaat pisinnaavoq, akiliutinut akiligassanngortinneqartunut, akiitsunut akilinngitsuukkanut, akileeqquneqarnermut akitsuutinut akiitsullu sinnerinut taarsigassarsialik siunissami akilersuisinnaanngitsutut Naalakkersuisut nalilerpassuk. Naalakkersuisut qinnuteqaammik naliliiniarnerminni akiitsut sinnerisa annertussusaat, qinnuteqartup maannamut akiliisinnaassusia akiliinissamullu piumassuseqarnera, qinnuteqartup pigisai nalillit aammalu inuussutissarsiornikkut piginnaanerisassaa naatsorsuutigineqartoq isiginiassavaat.

§ 43. Naalakkersuisut allamik aalajangigaqanngippata qinnuteqartup akiliisinnaajunnaarnerani, akiliisarnermik unitsitsinerani, isumaqatigiissutit uniorlugit iliuuseqarnerani, taarsigassarsisup tammaaneqartoq toqusimasutut isigineqarneranik eqqartuussisutigut aalajangiinnermi akiliisinnaassuseqannginneq peqqutigalugu atorunnaarsitsinnermi kiisalu piginnittut nikinneranni § 38 naapertorlugu taarsigassarsiat erniaqanngitsut akilersugassaanngitsullu akiligassanngortinneqassapput. Piginnittut nikinnerat tassaavoq akiligassallit qanorluunnit iliornikkut nikinnerat, tassunga ilaallutik niuernikkut akeqanngitsumillu tunniussinerit, taamatullu piginneqataasumut, aappaasumut, aappatut nalunaarsorsimasumut, kingornussisussanut inooqatigisamulluunniit tunniussinerit nuussinerilluunniit piginnittut nikinnerattut isigineqarpoq.

§ 44. Taarsigassarsiallit aningaasaqarnikkut annertuunik ajornartorsiuteqartut, akiliutinut akiligassanngortitanut, akiitsunut akilinngitsuukkanut, akileeqqusinnermi akitsuutinut akiitsullu sinnerinut isumakkeerfigineqarnissamut imaluunniit allangortitsinissamut piumasaqaatinik naammassinnissimanngikkaluartut, akiliutissaasa akilerneqarnissaannik Naalakkersuisut kinguartitsigallarsinnaapput.

Imm. 2. Naalakkersuisut akiliinissamik kinguartitsigallarsinnaapput:

1) Taarsigassarsiallip aningaasaqarnikkut annertuunik ajornartorsiuteqarnera qaangigassaappat, aammalu taarsigassarsiallip akiliisarnini nalinginnaasoq ukiup ataatsip iluani aallarteqqissinnaagaa naatsorsuutigineqarpat.

2) Taarsigassarsiallip taarsigassarsiaminik akiliisinnaanissaa ilimanaateqanngippat, aammalu taarsigassarsiallip isumakkeerinissamut imaluunniit allangortitsinissamut piumasaqaatit ukiut marluk iluanni naammassissappagit.

Imm. 3. Naalakkersuisut qinnuteqaammik naliliiniarnerminni akiitsut sinnerisa annertussusaat, qinnuteqartup maannamut akiliisinnaassusia akiliinissamullu piumassuseqarnera, qinnuteqartup pigisai nalillit aammalu inuussutissarsiornikkut piginnaanerisassaa naatsorsuutigineqartoq isiginiassavaat.

Iluarsaassinissamut, alliliinissamut imaluunniit pitsanngorsaanissamut tapiissutit

§ 45. Inissiat, inunnit ukiuni akileraaruteqarfusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasunit, imaluunniit inunnit, piffissaq manna tikillugu isertitai apeqqutaatinnagit siunissami qaninnermi ukiumi akileraaruteqarfusussami inoqutigiinni akileraaruteqaataasussanik 180.000 koruunit inorlugit isertitaqartussatut naatsorsuutigineqartunit pigineqartut, iluarsaannissaannut, allilerneqarnisaannut imaluunniit pitsanngorsarneqarnissaannut annerpaamik 100.000 koruuninik Naalakkersuisut tapiissuteqarsinnaapput.

Imm. 2. Naalakkersuisut taamaallat inissiamut Namminersornerullutik Oqartussanit taarsigassarsititsisoqarsimappat, imaluunniit maanna piginnittuusut taarsigassarsisuullutik Namminersornerullutik Oqartussanit taasigassarsititsisoqarsimappat tapiissuteqarsinnaapput.

Imm. 3. Isertitanut killiliussaq, meeqqanut ataasiakkaanut tamanut 18-it inorlugit ukiulinnut angerlarsimaffimmi najugaqartutut inuit allattorsimaffianni nalunaarsorsimasunut, amerlanerpaamilli meeqqanut arfinilinnut, meeqqamut ataatsimut 4.000 koruuninik qaffanneqartassaaq.

§ 46. Naalakkersuisut piffissaq qinnuteqarfusoq sioqqullugu qaammatit kingulliit 60-it iluanni § 45 naapertorlugu inissiamut tapiissuteqarsimappata, Naalakkersuisut tapiissuteqarsinnaanngillat.

Imm. 2. Naalakkersuisut qinnuteqaammik naliliiniarnerminni iluarsaassinissap, alliliinissap imaluunniit

pitsanngorsaanissap kissaatigineqartup annertussusaa, qinnuteqartup pigisaanut nalilinnut aammalu suliaassanik nammineerluni suliarinninnissamut piginnaanerisassaatus naatsorsuutigineqartumut, kiisalu inissiap pisoqaassusaanut niuernikkullu nalinganut naleqqiutissavaat.

Imm. 3. Iluarsaassinissamut, alliliinissamut pitsanngorsaanissamullu tapiiffigineqarnissamik qinnuteqaatinik aqutsineq, aammalu suliaassat suut tapiiffigineqarsinnaanersut pillugit Naalakkersuisut maleruagassiorsinnaapput.

Kapitali 5

Illunut sanaqataaffiusunut taarsigassarsiat imaluunniit tapiissutit

§ 47. Kapitali manna naapertorlugu kommuninut inuinnarnulluunniit namminersorsinnaassuseqartunut aammalu Kalaallit Nunaanni inuit allattorsimaffianni nalunaarsorsimasunut taapiissuteqartoqarsinnaavoq taarsigassarsititsisoqarsinnaallunuunniit.

§ 48. Naalakkersuisut illunik sanaqataaffiusunik pigisaqalernissamut taarsigassarsititsisinnaapput.

Imm. 2. Inissiap pioreersup illutut sanaqataaffiusutut pigineqalernissaanut Naalakkersuisut taarsigassarsititsisinnaapput, tak. § 38, imm. 1, nr. 2.

Imm. 3. Nammineq illuliap naammassineqanngitsup pioreersup illutut sanaqataaffiusutut pigineqalernissaanut Naalakkersuisut taarsigassarsititsisinnaapput.

Imm. 4. Naalakkersuisut illut sanaqataaffiusut aalajangersimasut suut taarsigassarsititsivigineqarsinnaanersut aalajangersinnaavaat, kiisalu ilusilersuinissamut atuinissamullu periarfissanut piumasaqaatit pillugit maleruagassiorsinnaallutik.

§ 49. § 48, imm. 1 naapertorlugu Naalakkersuisut taarsigassarsiarititaanni sanaqataaffiusutut illuliassanut katiteriaannarnut nalinginnaasunik ilusilerneqartussanut atortulersorneqartussanullu, sumiiffimmut tunniunneqartussanut aningaasartuutissanut uppersarsarneqarsimasunut tamakkiisunut akileeqaataassutissat pineqarput.

Imm. 2. § 48, imm. 2 naapertorlugu Naalakkersuisut taarsigassarsiarititaanni illumik pioreersumik pigisaqalernissamut atortussat ilassutissatut pisariaqartut ilanngullugit sumiiffimmut tunniunneqartussanut aningaasartuutissanut uppersarsarneqarsimasunut tamakkiisunut akileeqaataassutissat pineqarput.

Imm. 3. § 48, imm. 3 naapertorlugu Naalakkersuisut taarsigassarsiarititaanni nammineq illuliamik naammassineqanngitsumik pioreersumik pigisaqalernissamik atortussat ilassutissatut pisariaqartut ilanngullugit sumiiffimmut tunniunneqartussanut aningaasartuutissanut uppersarsarneqarsimasunut tamakkiisunut akileeqaataassutissat pineqarput.

Imm. 4. § 48, imm. 1-3 naapertorlugit Naalakkersuisut taarsigassarsiarititaanni aamma sanaqataasup ikiorserneqarneranut ilitersuisumillu ilitersorneqarneranut, kiisalu innaallagissamut, imermut kiassarnermullu atortulersuutit ikkussuunneqarnerinut aningaasartuutissanut uppersarsarneqarsimasunut akileeqaataassutissat ilaatinneqarsinnaapput.

§ 50. § 48 naapertorlugu Namminersornerullutik Oqartussanit taarsigassarsiarititat erniaqanngitsutut akilersugassaanngitsutullu tunniunneqassapput.

Imm. 2. Taarsigassarsiat piffissaq atuuffissaat ukiunik 33-nik sivilissuseqarpoq. Taarsigassarsiat piffissami atuuffigisaminni ukiut tamaasa annertoqatigiinnik aningaasartaqartinneqarlutik appartikkiartuaarneqassapput.

§ 51. § 48 naapertorlugu Naalakkersuisut taarsigassarsiarititassaat, qinnuteqartup ukiuni akileraaruteqarfiusuni tallimani kingullerni inoqutigiinni isertitaasa akileraaruteqaataasussat agguaqatigiissinneqarneri tunngavigalugit annertussusilerneqassapput.

Imm. 2. Naalakkersuisut taarsigassarsiarititassaat § 48 naapertorlugu aningaassartuutissat uppersarneqarsimasut tamakkiisut 95 procentiinik annertussuseqassapput.

Imm. 3. Naalakkersuisut taarsigassarsiarititassaat qinnuteqartup inoqutigiinni isertitai akileraaruteqaataasussat 180.000 koruuninit qaffasinnerusimappata 15.000 koruunikkaarlugit 5 procentpointinik appartinneqartassapput.

Imm. 4. Qinnuteqartup inoqutigiinni isertitai akileraaruteqaataasussat 450.000 koruuninit qaffasinneruppata Naalakkersuisut taarsigassarsititsissanngillat.

§ 52. Qinnuteqartup inoqutigiinni isertitai akileraaruteqaataasussat qinnuteqartup illumilu sanaqataaffiusumi inoqutissaasa isertitaattut akileraaruteqaataasussatut tamakkiisutut naatsorsorneqassapput.

Imm. 2. Illumut sanaqataaffiusumut iserternermut atatillugu qinnuteqartup inoqutai, qinnuteqartup illumut sanaqataaffiusumut taarsigassarsinissamik qinnuteqaammik tunniussinermini amerlassusissatut allassimasaanit amerlanerulersimasut paasineqarpat, Naalakkersuisut taarsigassarsiarititaat inoqutigiinni inuit amerlassusaannut paasissutissanut nutaanut naapertuuttunngorlugit allanngortinneqassapput.

§ 53. Taarsigassarsisup nammineerluni aningaasalersuutissanut taarsigassarsiarisimasinnaasai, kiisalu taarsigassarsisup sanaartorfissagissaanermut akitsuutitut uppersarneqarsimasunut pisortanillu innaallagissamut, imermut kuuffeqarfimmullu atassusiinissamut piumasaqaatinut taarsigassarsiarisimasinnaasai illup sanaqataaffiusup qularnaveeqqusiunneratigut qularnaarneqassapput.

Imm. 2. Naalakkersuisut taarsigassarsiarititaat illup sanaqataaffiusup qularnaveeqqusiunneqarneratigut qularnaarneqassapput. Naalakkersuisut taarsigassarsiarititaat, illu sanaqataaffiusoq qularnaveeqqusiullugu taarsigassarsisup nammineerluni aningaasaliissutissaanut, kiisalu taarsigassarsisup sanaartorfissagissaanermut akitsuutitut uppersarneqarsimasunut pisortanillu innaallagissamut, imermut kuuffeqarfimmullu atassusiinissamut piumasaqaatinut taarsigassarsiarisimasaasa allat akilereernerini akilernerneqartussatut inissisimassapput.

§ 54. Illunik sanaqataaffiusunik misileraalluni sanaartornermut atatillugu §§ 49 aamma 55, imm. 2-imi taaneqartut saniatigut Naalakkersuisut taarsigassarsititsisinnaapput, tapiissuteqarsinnaapput imaluunniit immikkut ittumik ikiorsiissuteqarsinnaallutik.

Imm. 2. Illunik sanaqataaffiusunik siornatigut sananeqarsimasunik naliliinermut atatillugu §§ 49 aamma 55, imm. 2-imi taaneqartut saniatigut Naalakkersuisut taarsigassarsititsisinnaapput, tapiissuteqarsinnaapput imaluunniit immikkut ittumik ikiorsiissuteqarsinnaallutik.

§ 55. Naalakkersuisut illumik sanaqataaffiusumik pigisaqalernissamut kommunimut tapiissuteqarsinnaapput.

Imm. 2. Naalakkersuisut tapiissutaanni sanaqataaffiusussatut illuliassanut katiteriaannaat, nalinginnaasunik ilusilersugaasut atortulersugaasullu, sumiiffimmi tunniunneqartut pineqarput. Tamatuma saniatigut Naalakkersuisut tapiissutaanni sanaqataasup ikiorserneqarneranut ilitersuisumillu ilitersorneqarneranut, kiisalu innaallagissamut, imermut kiassarnermullu atortulersuutit ikkussuunneqarnerinut aningaasartuutissanut uppersarneqarsimasunut akileeqataassutissat ilaatinneqarsinnaapput.

§ 56. Kapitali manna naapertorlugu taarsigassarsinissamik imaluunniit tapiiffigineqarnissamik qinnuteqaatit kingusinnerpaamik decembarip ulluisa aallaqqaataanni Naalakkersuisunut nassiunneqassapput. Naalakkersuisut qinnuteqarnissamut piffissarititap sanioqunneqarnissaanut immikkut ittumik akuersissuteqarsinnaanngillat.

Imm. 2. § 48, imm. 1-3 naapertorlugu qinnuteqaat nammineerluni aningaasaliissutissanut uppernarsaatinik, kiisalu nunaminertamik tunineqarnermut imaluunniit nunaminertamik inniminniinnermut akuersissutip assilineranik ilaqartinneqassapput. Qinnuteqartoq ukiuni akileraaruteqarfusuni tallimani kingullerni inuussutissarsiornermik ingerlataqarsimanngippat, Naalakkersuisut qinnuteqaammut itigartitsissapput.

Atuinissamut killiliissutit aamma taarsigassarsiat akiligassanngortinneqartarnerat

§ 57. Taarsigassarsisup § 48 naapertorlugu neriorsuummik allakkiap suliarineqarnerata ullulernerqarneraniit ukiut marluk qaangiutsinnagit illu sanaqataaffiusoq naammassisimassavaa atulersimassallugulu. Taamaangippat neriorsuut siumut ilisimatitsinertaqaanngitsumik atorunnaarsinneqassaaq.

Imm. 2. Naalakkersuisut pisuni immikkut ittuni imm. 1-imi piffissamut killiliussap sanioqunneqarnissaanut immikkut ittumik akuersissuteqarsinnaapput.

Imm. 3. Taarsigassarsisup illu sanaqataaffiusoq naammasseriigaaq qularnaveeqqusiullugu qularnaveeqqusiussaarluni taarsigassarsinnermut allagartamik inaarutaasumik pigisaqalernissaata tungaanut, atortunut tunniussorneqartunut tamanut, kiisalu illumik sanaqataaffiusumik sananeqartumik Naalakkersuisut piginnittussaataapput, taakkunungattaq ilaallutik nalillit taarsigassarsisup nammineerluni sulinermigut imaluunniit illumut sanaqataaffiusumut aningaasaliissuteqarnermigut pilersitai.

§ 58. § 48 naapertorlugu taarsigassarsiat tamarmik nalikilliliiffigineqarnissaasa akilernerqarnissaasalu tungaannut atuinissamut killiliissutit makku atuutsinneqassapput:

- 1) Inissiaq eqqartuussisutigoortumik sulissutiginninnermut atorneqarsinnaangilaq.
- 2) Inissiaq qularnaveeqqutitut atorneqarsinnaangilaq, taamaattorli tak. § 53.

§ 59. Naalakkersuisut allamik aalajangigaqaanngippata, piginnittut nikinneranni § 48 naapertorlugu taarsigassarsiarititat akiligassanngortinneqassapput, taamaattorli tak. imm. 2.

Imm. 2. Taarsigassarsisup toqunerani taarsigassarsisup aapparisaq pinngitsooranilu kingornussisussai taarsigassarsisup taarsigassarsianut pisinnaatitaaffinik pisussaaffinillu tigusinissamik pisinnaatitaapput.

§ 60. § 48 naapertorlugu Naalakkersuisut taarsigassarsiarititaat akiligassanngortinneqassapput:

- 1) Taarsigassarsisup illu sanaqataaffiusoq illersorneqarsinnaasumik aserfallatsaalisimanngippagu, aammalu tamatumuunaannakkut Naalakkersuisut qularnaveeqqusiussaanni qularnaveeqqut ajorseriartoq paasineqarpat.
- 2) Taarsigassarsisup illu sanaqataaffiusoq ikuallattoornissamut anorersuarneranilu ajoqusernissamut sillimmasersimanngippagu, tak. § 8.
- 3) Taarsigassarsisup illu sanaqataaffiusoq isaterpagu.
- 4) Illumi sanaqataaffiusumi ininik inuussutissarsiorfusunik pilersitsisoqarpat, imaluunniit illumit sanaqataaffiusumit inuussutissarsiuutinik ingerlatsisoqarpat. Tassanili inuussutissarsiuutit namminersortut mikinerusut pineqaanngillat.
- 5) Taarsigassarsisup Naalakkersuisut akuersiteqqaarnagit illu sanaqataaffiusoq qimallugu allamut nuuppat

inissiamilluunniit attartortitsippat.

6) Taarsigassarsisup Naalakkersuisut illumik sanaqataaffiusumik takusaaneranni isernissaannut itigartippagit.

§ 61. Taarsigassarsiat akiligassanngortinneqarnerini taarsigassarsisup taarsigassarsiat erngerluni akilinngippagit, Naalakkersuisut illu sanaqataaffiusoq tigussallugu aalajangersinnaapput.

Imm. 2. Naalakkersuisut illu sanaqataaffiusoq tiguppasuk, Namminersornerullutik Oqartussat taarsigassarsisullu akornanni aningaasatigut isumannaarneqartussat Naalakkersuisut naatsorsussavaat.

Imm. 3. Aningaasatigut isumannaarneqartussat naatsorsornerini piffissami utertitsiffiusumi illup sanaqataaffiusup teknikkikut aningaasaqarnikkullu nalinganut Naalakkersuisut akiitsut sinnerinit pisassaat ilanngaatineqassapput. Naatsorsukkat inernerini taarsigassarsisoq pisassaqqarpap taakku tunniunneqassapput.

Iluarsaassinermut tapiissutit

§ 62. Illut sanaqataaffiusut inunnit ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasunit, imaluunniit inunnit, piffissaq manna tikillugu isertitai apeqqutaatinngit siunissami qaninnermi ukiumi akileraaruteqarfiusussami inoqutigiinni akileraaruteqaataasussanik 180.000 koruunit inorlugit isertitaqartussat naatsorsuutigineqartunit pigineqartut, iluarsaannissaannut annerpaamik 75.000 koruuninik Naalakkersuisut tapiissuteqarsinnaapput.

Imm. 2. Inissiamut Naalakkersuisunit taarsigassarsititsisoqarsimappat, imaluunniit maanna piginnittuusut taarsigassarsisuullutik Naalakkersuisunit taarsigassarsititsisoqarsimappat aatsaat Naalakkersuisut tapiissuteqarsinnaapput.

Imm. 3. Isertitanut killiliussaq, meeqqanut ataasiakkaanut tamanut 18-it inorlugit ukiulinnut angerlarsimaffimmi najugaqartutut inuit allattorsimaffianni nalunaarsorsimasunut, amerlanerpaamilli meeqqanut arfinilinnut, meeqqamut ataatsimut 4.000 koruuninik qaffanneqartassaaq.

§ 63. Naalakkersuisut piffissaq qinnuteqarfiusoq sioqqullugu qaammatit kingulliit 60-it iluanni § 62 naapertorlugu illumut sanaqataaffiusumut tapiissuteqarsimappata, Naalakkersuisut tapiissuteqarsinnaanngillat.

Imm. 2. Naalakkersuisut qinnuteqaammik naliliiniarnerminni illumi sanaqataaffiusumi iluarsaassinissap annertussusaa, qinnuteqartup pigisaanut nalilinnut aammalu suliaassanik nammineerluni suliarinninnissamut piginnaanerisassaatur naatsorsuutigineqartumut, kiisalu inissiap pisoqaassusaanut niuernikkullu nalinganut naleqqiutissavaat.

Imm. 3. Illumi sanaqataaffiusumi iluarsaassinissamut tapiiffigineqarnissamik qinnuteqaatinik aqutsineq, aammalu suliaassat suut tapiiffigineqarsinnaanersut pillugit Naalakkersuisut maleruagassiorsinnaapput.

Kapitali 6

Atuutilersitsinissamut aalajangersakkat.

§ 64. Inatsisartut peqqussutaat 1. januar 2008-mi atuutilerpoq.

Imm. 2. Tamatumunnga peqatigitillugu inissialiortiternermut tapersiissuteqartarneq pillugu Inatsisartut peqqussutaat nr. 1, 9. april 1992-imeersoq atorunnaarsinneqarpoq.

Imm. 3. Peqqussutit Inatsisartut peqqussutaanni imm. 2 naapertorlugu aalajangersarneqarsimasut

atuutsiinnarneqarsimasullu Inatsisartut peqqussutaanni matumani maleruagassat aalajangersarneqartut naapertorlugit taarsiinissap imaluunniit atorunnaarsitsinissap tungaanut atuutiinnassapput.

Namminersornerullutik Oqartussat, ulloq 19. november 2007

Hans Enoksen

/

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut